



Philippine Biblical Worldview Institute

Certificate in Biblical Studies

CBS1200 Tito to Jude

Conrad Jun Tolosa

CBS1202 Filemon

¹ Mula kay Pablo, isang bilanggo dahil kay Cristo Jesus, at mula kay Timoteo na ating kapatid—

Para kay Filemon, ang minamahal naming kamanggagawa, ² at para sa iglesyang nagtitipon sa iyong bahay; kay Apia na aming^[a] kapatid na babae at kay Arquipo na kapwa naming^[b] kawal sa Panginoon.

³ Sumainyo nawa ang kagandahang-loob at kapayapaang mula sa Diyos na ating Ama at sa Panginoong Jesu-Cristo.

Ang Pag-ibig at Pananampalataya ni Filemon

⁴ Lagi akong nagpapasalamat sa aking Diyos tuwing isinasama kita sa aking pananalangin ⁵ sapagkat nababalitaan ko ang pag-ibig na ipinapakita mo sa lahat ng hinirang ng Diyos, at gayundin ang iyong pananampalataya sa Panginoong Jesus. ⁶ Idinadalangin kong ang pagkakabuklod natin sa isang pananampalataya ay magbunga ng mas malalim na pagkaunawa sa mga kabutihang dulot ng ating pakikipag-isa kay Cristo. ⁷ Kapatid, ang pagmamahal mo ay nagdulot sa akin ng malaking katuwaan at kaaliwan sapagkat dahil sa iyo ay sumigla ang kalooban ng mga hinirang ng Diyos.

Kahilingan para kay Onesimo

⁸ Kaya nga, bagaman bilang kapatid mo kay Cristo ay malakas ang loob kong iutos sana sa iyo ang nararapat gawin, ⁹ mas minabuti kong makiusap sa iyo sa ngalan ng pag-ibig. Akong si Pablo, na sugo ni Cristo Jesus at ngayo'y nakabilanggo dahil sa kanya,^[c] ¹⁰ ay nakikiusap sa iyo para kay Onesimo na aking anak sa pananampalataya. Ako'y naging isang ama sa kanya habang ako'y nakabilanggo. ¹¹ Dati, hindi mo mapakinabangan si Onesimo,^[d] ngunit ngayo'y kapaki-pakinabang siya sa ating dalawa.

¹² Pinababalik ko na siya sa iyo, kasama ang aking puso. ¹³ Nais ko sanang manatili siya sa aking piling upang siya ang maglingkod sa akin habang ako'y nakabilanggo dahil sa Magandang Balita, at sa gayon ay para na ring ikaw ang kasama ko rito. ¹⁴ Ngunit ayokong gawin iyon nang wala kang pahintulot upang maging kusa ang iyong pagtulong sa akin, at hindi sapilitan.

¹⁵ Marahil, nalayo sa iyo si Onesimo nang kaunting panahon upang sa pagbabalik niya'y makasama mo siya habang panahon, ¹⁶ hindi lamang bilang isang alipin kundi bilang isang minamahal na kapatid. Napamahal na siya sa akin, at lalo siyang mapapamahal sa iyo, ngayong hindi mo lamang siya alipin, kundi isa nang kapatid sa Panginoon!

¹⁷ Kaya't kung kinikilala mo akong tunay na kasama, tanggapin mo siya tulad ng pagtanggap mo sa akin. ¹⁸ Kung siya ma'y nagkasala o nagkautang sa iyo, sa akin mo na ito singilin. ¹⁹ Akong si Pablo ang siyang sumusulat nito: AKO ANG MAGBABAYAD SA IYO. Hindi ko na dapat banggitin pa na utang mo sa

akin ang iyong sarili. ²⁰ Ipinapakiusap ko lamang sa iyo, alang-alang sa Panginoon, ipagkaloob mo na sa akin ito. Pasayahin mo ako bilang kapatid kay Cristo.

²¹ Lubos akong naniniwala na gagawin mo ang hinihiling ko sa sulat na ito, at maaaring higit pa rito. ²² Ipaghanda mo rin ako ng matutuluyan sapagkat umaasa akong loloobin ng Diyos na ako'y makabalik diyan, gaya ng inyong idinadalangin.

Pangwakas na Pagbati

²³ Kinukumusta ka ni Epafras na kasama kong nakabilanggo dahil kay Cristo Jesus. ²⁴ Kinukumusta ka rin nina Marcos, Aristarco, Demas, at Lucas, na mga kasama ko sa gawain.

²⁵ Nawa'y sumainyo ang kagandahang-loob ng ating Panginoong Jesu-Cristo.

Multiple Choice:

1. Ayon sa liham na nabasa, alin sa mga sumusunod ang tamang statement?
 - a. Tinignan ni Apostol Pablo ang kanyang sarili bilang bilanggo ni Cristo.
 - b. Kinilala ni Apostol Pablo si Filemon bilang isang believer na may pagmamahal sa Panginoong Jesus at sa kanyang kapwa mananampalataya.
 - c. Ang pagmamahal ni Filemon ay nagdulot ng katuwaan at kaaliwan sa kanila.
 - d. All of the above

2. Piliin ang statement na hindi tugma sa liham na binasa?
 - a. Hindi nagpakita ng pagmamalasakit si Pablo kay Onesimus.
 - b. Walang naging pakinabang si Filemon kay Onesimus.
 - c. Binalaan ni Pablo si Filemon tungkol kay Onesimus dahil ang taong ito ay mapagsamantala at sariling kapakanan lamang ang laging nasa isip.
 - d. All of the above

3. Alin ang maling statement?
 - a. Sinabi ni Pablo kay Filemon na kung ano man ang pagkukulang ni Onesimus sa kanya, singilin niya ito kay Pablo.
 - b. Si Onesimus ay katiwala dati ni Filemon.
 - c. Sinabi ni Pablo na wala sa isip niya na merong pagkakautang sa kanya si Filemon.
 - d. All of the above